



西京雜記

乾



西京雜記序



漢之西京。惟固書為該練。非固之能爾。亦其所資者繕也。仲尼約之寶書。馬遷鳩諸國史。因本而成。在古皆然也。暇得葛洪氏西京雜記。讀之。云。為劉子駿所撰。以甲乙次第。百卷。考比固作。殆是全取劉書。有不異同耳。洪又抄集。固所不錄者。二萬許言。命曰西京雜記。予

於是始知固之漢書。蓋根起於子駿也。乃逆憶其所不錄之故。大約有四。則猥瑣可畧。閑漫無歸。與夫香昧。而難憑。觸忌而須諱者也。其猥瑣者。則霍妻遺行之類是也。其閑漫者。則上林異植之類是也。其香昧者。則宜獄佩鏡。秦庫玉燈之類是也。而其觸忌者。則慶節趙后之類是也。凡若此者。披



金。置沙法。所刪棄矣。至於乘輿大駕。儀左典章。鮑董問對。言閑理奧。亦皆擯落。而無採。宜書而不書者何也。豈不幸存於禠記歟。但今所傳且失其半。又非洪之故。公問天。嗚呼。後之代儒。安得如子駿者。選收彙集。以待班固者出歟。誠為史家之一概也。

明 吳郡黃省曾 撰

西京雜記卷第一



晉 丹陽葛洪集
明 新安程榮校

漢高帝七年蕭相國營未央宮因龍首山製前殿建北闕未央宮周迴二十二里九十五步五尺街道周迴七十里臺殿四十三其三十二在外其十一在後宮池十三山六池一山一亦在後宮門闈凡九十五武帝作昆明池欲伐昆吾夷教習水戰因而於上游戲養魚魚給諸陵廟

祭祀餘付長安市賣之池周迴四十里

漢制宗廟八月飲酎用九醞太牢皇帝侍祠以正月旦作酒八月成名曰酎一曰九醞一名醇

京師大水祭山川以止雨丞相御史二千石禱祠如求雨灋

天子筆管以錯寶為跗毛皆以秋兔之毫官師路扈為之以雜寶為匣廁以玉璧翠羽皆直百金

漢制天子玉几冬則加綵錦其上謂之綵几以象牙為火籠籠上皆散華文後宮則五色綾文以酒為書滴取其不冰以玉為硯亦取其不冰夏設羽扇冬設繒扇公侯皆以竹木為几冬則以細剝為橐以憑之不得加綵錦

武帝昔西域獻吉光裘入水不濡上昔服此裘以聽朝
高帝戚夫人善鼓瑟擊筑帝常擁夫人倚瑟而絃歌畢每泣下流漣夫人善為翹袖折腰之舞

歌出塞入塞望歸之曲。侍婢數百皆習之。後宮齊首高唱。聲入雲霄。

戚姬以百鍊金為彊環。照見指骨。上惡之。以賜侍兒。鳴玉耀光等各四枚。

趙王如意。年幼未能親外傳。戚姬使舊趙王內傳趙媼。傳之。號其室曰養德宮。後改為魚藻宮。

惠帝嘗與趙王同寢處。呂后欲殺之。而未得。後帝早獵。王不能夙興。呂后命力士於被中縊殺之。及死。呂后不之信。以綠囊盛之。載以小駟。

八見乃厚賜力士。力士是東郭門外官奴。帝後知腰斬之後不知也。

樂遊苑自生玫瑰樹。樹下多苜蓿。苜蓿一名懷風。昔人或謂之光風。風在其間常蕭蕭然。日照其花有光采。故名苜蓿為懷風。茂陵人謂之連枝草。

太液池邊皆是彫胡。紫葳綠節之類。菰之有米者。長安人謂為彫胡。葭蘆之未解葉者。謂之紫葳。菰之有首者。謂之綠節。其間鳧雛鴈子。布滿

充積又多紫龜綠鼈池邊多平沙沙上鶉鵒鵠
鳴鵠鵠鴻鴟動輒成羣

終南山多離合草葉似江離而紅綠相雜莖皆
紫色氣如蘿勒有樹直上百尺無枝上結藜條
如車蓋葉一青一赤望之斑駁如錦繡長安謂
之丹青樹亦云華蓋樹亦生熊耳山

漢帝相傳以秦王子嬰所奉白玉璽高祖斬白
蛇劍劍上有七采珠九華玉以爲飾雜廁五色
琉璃爲劍匣劍在室中光景猶照於外與挺劍

不殊十二年一加磨瑩亦上常若霜雪開匣拔
鞘輒有風氣光彩射人

漢綵女常以七月七日穿七孔鍼於開襟樓俱
以習之

宣帝被收繫郡邸獄臂上猶帶史良娣合采婉
轉絲繩繫身毒國寶鏡一枚大如八銖錢舊傳
此鏡見妖魅得佩之者爲天神所福故宣帝從
危獲濟及卽大位每持此鏡感咽移辰常以琥
珀筭盛之緘以戚里織成錦一日斜文錦帝崩

不知所在

一貫珠 珮部 珮十切

霍光妻遺淳于衍蒲桃錦二十四匹。散花綾二十五匹。綾出鉅鹿陳寶光家。寶光妻傳其法。霍顯召入其第。使作之。機用一百二十鐻。六十日成一匹。匹直萬錢。又與走珠一珮。綠綾百端。錢百萬。黃金百兩。為起第宅。奴婢不可勝數。衍猶怨曰。吾為爾成何功。而報我若是哉。濟陰王興居反。始舉兵。大風從東來。直吹其旌旗。飛上天。入雲。而墮城西井中。馬皆悲鳴。不進。

左右李鄴等諫不聽。後卒自殺。

五鹿充宗受學於弘。成子。成子少時。嘗有人過已。授以文石。大如鷲卵。成子吞之。遂大明悟。為天下通儒。成子後病。吐出此石。以授充宗。又為碩學也。

始元元年。黃鵠下太液池。上為歌曰。黃鵠飛兮。下建章羽。蕭蕭兮。行蹌蹌。金為衣兮。菊為裳。唼喋荷荇。出入蒹葭。自顧菲薄。愧爾嘉祥。漢帝送死。皆珠襦玉匣。匣形如鎧甲。連以金縷。

武帝匣上皆鏤爲蛟龍鸞鳳龜麟之象。世謂爲蛟龍玉匣。

成帝設雲帳雲幄雲幕於甘泉紫殿。世謂三雲殿。漢掖庭有月影臺。雲光殿。九華殿。鳴鸞殿。開襟閣。臨池觀。不在簿籍。皆繁華窈窕之所棲宿焉。

趙飛鸞女第居昭陽殿中。庭彤朱而殿上丹漆。砌皆銅沓黃金塗。白玉階。璧帶往往爲黃金釭。合藍田璧明珠翠羽飾之。上設九金龍。皆銜九

子金鈴。五色流蘇帶。以綠文紫綬。金銀花鐺。每好風日。幡旌光影照耀。殿鈴鐺之聲。驚動左右。中設木畫屏風。文如蜘蛛絲縷。玉几玉牀。白象牙簾。綠熊席。席毛長二尺餘。人眠而擁毛。自蔽望之不能見。坐則沒膝。其中雜熏諸香。一坐此席。餘香百日不歇。有四玉鎮。皆達照無瑕缺。窻扉多是綠琉璃。亦皆達照。毛髮不得藏焉。椽桷皆刻作龍蛇縈繞。其間麟甲分明。見者莫不兢慄。匠人丁緩李菊。巧爲天下第一。締構旣成。

向其姊子樊延年說之。而外人稀知。莫能傳者。積草池中。有珊瑚樹。高一丈二尺。一本三柯。上有四百六十二條。是南越王趙佗所獻。號為烽火樹。至夜光景常欲燃。

昆明池刻玉石為魚。每至雷雨。魚常鳴吼。鬣尾皆動。漢世祭之以祈雨。往往有驗。

初修上林苑。羣臣遠方各獻名果異樹。亦有製為美名。以標奇麗。○梨十。紫梨。青梨。實大芳梨。實小大谷梨。細梨。縹葉梨。金葉梨。出琅瑯。王野家。太守王唐所獻。瀚海

梨。出瀚海北。耐寒不枯。東王梨。出海中。紫條梨。○棗七。弱枝

棗。玉門棗。棠棗。青華棗。朽棗。赤心棗。西王棗。出崑崙

山。○栗四。侯栗。榛栗。瑰栗。嶧陽栗。嶧陽都尉曹龍所獻。大如

拳。○桃十。秦桃。桴桃。細核桃。傘城桃。綺葉桃。紫

文桃。霜桃。霜下可食。胡桃。出西域。櫻桃。含桃。○李十五。

紫李。綠李。朱李。黃李。青綺李。青房李。同心李。車

下李。合枝李。金枝李。顏淵李。出魯羞李。燕李。蠻李。

侯李。○柰三。白柰。紫柰。花紫色。綠柰。花綠色。○查三。

蠻查。羞查。猴查。○柀三。青柀。青葉柀。烏柀。○棠

四赤棠白棠青棠沙棠○梅七朱梅紫葉梅紫

花梅同心梅麗枝梅燕梅猴梅○杏二文杏有村

采蓬萊杏東郭都尉于吉所獻一株花○桐三雜五色六出云是仙人所食

椅桐梧桐荆梧○林檎十株○枇杷十株○橙

十株○安石榴○檉十株○白銀樹十株○黃

金樹十株○槐六百四十株○千年長生樹十

株○萬年長生樹十株○扶老木十株○守宮

槐十株○金明樹二十株○搖風樹十株○鳴

風樹十株○琉璃樹七株○池離樹十株○離

婁樹十株○柗四株○樅七株○白俞栲杜栲

桂蜀漆樹十株○栝十株○楔四株○楓四株

余就上林今虞淵得朝臣所上草木名二千餘

種隣人石瓊就余求借一皆遺棄今以所記憶

列於篇右

長安巧工丁緩者為常滿燈七龍五鳳雜以芙

蓉蓮藕之奇又作卧褥香鑪一名被中香鑪本

出房風其法後絕至緩始更為之為機環轉運

四周而鑪體常平可置之被褥故以為名又作

九層博山香鑪，鏤為奇禽怪獸，窮諸靈異，皆自然運動。

又作七輪扇，連七輪，大皆徑丈，相連續，一人運之，滿堂寒顫。

趙飛鸞為皇后，其女弟在昭陽殿，遺飛鸞書曰：今日嘉辰，貴姊懋膺洪冊，謹上祿三十五條，以陳踊躍之心。

金華紫輪帽 金華紫輪面衣 織成上襦
織成下裳 五色文綬 鴛鴦繻 鴛鴦被

鴛鴦褥 金錯繡襦 七寶綦履 五色文玉

環 同心七寶釵 黃金步搖 合歡圓璫

琥珀枕 龜文枕 珊瑚玦 馬腦彊 雲母

扇 孔雀扇 翠羽扇 九華扇 五明扇

雲母屏風 琉璃屏風 五層金博山香鑪

迴風扇 椰葉席 同心梅 含枝李 青木

香 沈水香 香螺卮 出南海 各丹螺 九真雄麝

香 七枝燈

趙后體輕，腰弱，善行步進退，女弟昭儀不能及。

也。但昭儀弱骨豐肌。尤工笑語。一人並色如紅玉。為當時第一。皆擅寵後宮。

西京雜記卷第一終

西京雜記卷第二

晉 丹陽葛洪集
明 新安程榮校

元帝後宮既多。不得常見。乃使畫工圖形案圖。召幸之。諸宮人皆賂畫工。多者十萬。少者亦不減五萬。獨王嬙不肯。遂不得見。匈奴入朝。求美人為閼氏。於是上案圖以昭君行。及去。召見貌為後宮第一。善應對。舉止閑雅。帝悔之。而名籍已定。帝重信於外國。故不復更入。乃窮案其事。

畫工皆棄市籍其家資皆巨萬畫工有杜陵毛延壽爲人形醜好老少必得其真安陵陳敞新豐劉白龔寬並工爲牛馬飛鳥衆勢人形好醜不逮延壽下杜陽望亦善畫尤善布色樊育亦善布色同日棄市京師畫工於是差稀

武帝欲殺乳母乳母告急於東方朔朔曰帝忍而復旁人言之益死之速耳汝臨去但屢顧我我當設奇以激之乳母如言朔在帝側曰汝宜速去今已大豈念汝乳哺時恩邪帝愴然遂舍

之

五侯不相能賓客不得來往婁護豐辨傳食五侯間各得其懽心競致奇膳護乃合以爲鯖世稱五侯鯖以爲奇味焉

公孫弘起家徒步爲丞相故人高賀從之弘食以脫粟飯覆以布被賀怨曰何用故人富貴爲脫粟布被我自育之弘大慙賀告人曰公孫弘內服貂蟬外衣麻枲內廚五鼎外膳一肴豈可以示天下於是朝廷疑其矯焉弘嘆曰寧逢惡

賓不逢故人

文帝自代還，有良馬九匹，皆天下之駿馬也。一名浮雲，一名赤電，一名絕羣，一名逸驃，一名紫鸞，一名綠螭，一名龍子，一名麟駒，一名絕塵，號為九逸。有來宣能御代王，號為王良，俱還代邸。

武帝時，身毒國獻連環羈，皆以白玉作之。馬腦石為勒，白光琉璃為鞍。鞍在閤室中，常照十餘丈，如晝日。自是長安始盛飾鞍馬，競加雕鏤。或

一馬之飾，直百金。皆以南海白蜃為珂，紫金為華，以飾其上。猶以不鳴為患，或加以鈴鐸，飾以流蘇。走則如撞鐘磬，若飛幡葆。後得貳師天馬，帝以玳瑁石為鞍鏤，以金銀鍮石以綠地五色錦為蔽泥。後稍以熊羆皮為之。熊羆毛有綠光，皆長二尺者，直百金。卓王孫有百餘雙，詔使獻二十枚。

昭帝時，茂陵家人獻寶劍，上銘曰：直千金，壽萬歲。

司馬相如。初與卓文君還成都。居貧愁懣。以所著鷓鴣裘。就市人陽昌買酒。與文君爲權。既而文君抱頸而泣曰。我平生富足。今乃以衣裘買酒。遂相與謀於成都賣酒。相如親著犢鼻褌。滌器以耻王孫。王孫果以爲病。乃厚給文君。遂爲富人。文君姣好。眉色如望遠山。臉際常若芙蓉。肌膚柔滑如脂。十七而寡。爲人放誕風流。故悅長卿之才。而越禮焉。長卿素有消渴疾。及還成都。悅文君之色。遂以發痼疾。乃作美人賦。欲以

自刺。而終不能改。卒以此疾至死。文君爲誄傳於世。

慶安世年十五。爲成帝侍郎。善鼓琴。能爲雙鳳離鸞之曲。趙后悅之。白上。得出入御內。絕見愛幸。常著輕絲履。招風扇。紫綠裘。與后同居處。欲有子而終無胤嗣。趙后自以無子。常託以祈禱。別開一室。自在。有侍婢以外。莫得至者。上亦不得至焉。以駟車載輕薄少年。爲女子服。入後宮者。日以十數。與之淫通。無時休息。有疲怠者。輒

西京雜記卷三
十一
差代之而卒無子

太上皇從長安居深宮。悽愴不樂。高祖竊因左右問其故。以平生所好。皆屠販少年。酤酒賣餅。鬪鷄蹴鞠。以此爲懽。今皆無此。故以不樂。高祖乃作新豐。移諸故人實之。太上皇乃悅。故新豐多無賴。無衣冠子弟。故也。高祖少時常祭枌榆之社。及移新豐。亦還立焉。高帝既作新豐。并移舊社。衢巷棟宇。物色惟舊。士女老幼。相攜路首。各知其室。放犬羊雞鴨於通塗。亦競識其家。其

匠人胡寬所營也。移者悅其似。而德之。故競加賞贈。月餘致累百金。

漢諸陵寢。皆以竹爲簾。簾皆爲水紋。及龍鳳之像。昭陽殿織珠爲簾。風至則鳴如珩珮之聲。楊雄讀書。有人語之曰。無爲自苦。玄故難傳。忽然不見。雄著太玄經。夢吐鳳凰集玄之上。頃而滅。

司馬相如爲上林子虛賦。意思蕭散。不復與外事相關。控引天地。錯綜古今。忽然如睡。煥然而

興幾百日而後成其友人盛覽字長通祥河名
士嘗問以作賦相如曰合綦組以成文列錦繡
而爲質一經一緯一宮一商此賦之迹也賦家
之心苞括宇宙總覽人物斯乃得之於內不可
得而傳覽乃作合組歌列錦賦而退終身不復
敢言作賦之心矣

董仲舒夢蛟龍入懷乃作春秋繁露詞
或問楊雄爲賦雄曰讀千首賦乃能爲之
匡衡字稚圭勤學而無燭隣舍有燭而不逮衡

乃穿壁引其光以書映光而讀之邑人大姓文
不識家富多書衡乃與其傭作而不求償主人
怪問衡衡曰願得主人書遍讀之主人感嘆資
給以書遂成大學衡能說詩時人爲之語曰無
說詩匡鼎來匡說詩解人願鼎衡小名也時人
畏服之如是聞者皆解頤懽笑衡邑人有言詩
者衡從之與語質疑邑人挫服倒屣而去衡追
之曰先生畱聽更理前論邑人曰窮矣遂去不
反

長安有儒生曰惠莊。聞朱雲折五鹿充宗之角，乃歎息曰：「粟犢反能爾邪？吾終耻溺死溝中。」遂裹糧從雲，雲與言，莊不能對，遂巡而去。拊心謂人曰：「吾日不能劇談，此中多有。」

武帝過李夫人，就取玉簪搔頭，自此後宮人搔頭皆用玉，玉價倍貴焉。

杜陵杜夫子善奕碁，為天下第一。人或譏其費日，夫子曰：「精其理者，足以大禪聖教。」

成帝好蹴鞠，羣臣以蹴鞠為勞體，非至尊所宜。

帝曰：「朕好之，可擇似而不勞者。」奏之家君作彈碁以獻，帝大悅，賜青羔裘紫履服，以朝覲。

元封二年，大寒，雪深五尺，野鳥獸皆死，牛馬皆踉蹌如蠟。三輔人民凍死者十有二三。

武帝為七寶牀，雜寶案，廁寶屏風，列寶帳，設於桂宮。昔人謂之四寶宮。

瓠子河決，有蛟龍從，九子自決中逆上，入河噴沫，流波數十里。

文帝初，多雨，積霖至百日而止。

王鳳以五月五日生其父欲不舉曰俗諺舉五
日子長及戶則自害不則害其父母其叔父曰
昔田文以此日生其父嬰勅其母曰勿舉其母
竊舉之後為孟嘗君號其母為薛公大家以古
事推之非不祥也遂舉之

惠帝七年夏雷震南山大木數千株皆火燃至
末其下數十畝地草皆焦黃其後百許日家人
就其間得龍骨一具鮫骨二具
高祖為泗水亭長送徒驪山將與故人訣去徒

卒贈高祖酒二壺鹿肝牛肝各一高祖與樂從
者飲酒食肉而去後即帝位朝脯尚食常具此
二炙并酒二壺

梁孝王好營宮室苑囿之樂作曜華之宮築兔
園園中有百靈山山有膚寸石落猿巖棲龍岫
又有雁池池間有鶴洲鳧堵其諸宮觀相連延
亘數十里奇果異樹瑰禽怪獸畢備王日與賓
客弋釣其中

魯恭王好鬪雞鴨及鷺雁養孔雀鵠鵲俸穀一

年費二千石

會稽歲首獻竹簟供御世號為流黃簟

朱買臣為會稽太守懷章綬還至舍亭而國人未知也所知錢勃見其暴露乃勞之曰得無罷手遺與紈扇買臣至郡引為上客尋遷為掾史

西京雜記卷第二終

西京雜記卷第三

晉 丹陽葛洪集

明 新安程榮校

余所知有鞠道龍善為幻術向余說古昔事有東海人黃公少嘗為術能制龍御虎佩赤金刀以絳繒束髮立興雲霧坐成山河及衰老氣力羸憊飲酒過度不能復行其術秦未有白虎見於東海黃公乃以赤刀往厭之術既不行遂為虎所殺三輔人俗用以為戲漢帝亦取以為角

抵之戲焉。又說淮南王好方士，方士皆以術見。遂有畫地成江河，撮土爲山巖，噓吸爲寒暑，噴嗽爲雨露。王亦卒與諸方士俱去。

楊子雲好事，常懷鉛提槧，從諸計吏訪殊方絕域四方之語，以爲禪補，輜軒所載亦洪意也。文帝嘗鄧通得賜蜀銅山，聽得鑄錢，文字肉好，皆與天子錢同。故富侔人主，嘗吳王亦有銅山鑄錢，故有吳錢，微重文字肉好，與漢錢不異。楊貴字王孫，京兆人也。生昔厚，自奉養，死卒裸。

葬於終南山。其子孫掘土鑿石，深七尺而下屍。上復蓋之，以石欲儉而反奢也。

傅介子年十四，好學書，嘗棄觚而歎曰：大丈夫當立功絕域，何能坐事散儒？後卒斬匈奴使者，還拜中郎，復斬樓蘭王首，封義陽侯。

余少嘗聞平陵曹敞在吳章門下，往往好斥人，過以爲輕薄，世人皆以爲然。章後爲王莽所殺，人無有敢收葬者。弟子皆更易姓名以從他師。敞嘗爲司徒掾，獨稱吳章弟子收葬其屍，方知

九善
作兄
今改
之

亮直者不見容於凡輩中矣。平陵人生為立碑於吳章墓側。在龍首山南幕嶺上。文帝為太子立思賢苑以招賓客。苑中有堂隍六所。客館皆廣廡高軒。屏風幃褥甚麗。廣陵王胥有勇力。常於別囿學格熊。後遂能空手搏之。莫不絕脰。後為獸所傷。陷腦而死。郭威字文偉。茂陵人也。好讀書。以謂爾雅周公所制。而爾雅有張仲孝友。張仲宣主昔人。非周公之制明矣。余嘗以問楊子雲。子雲曰。孔子門

徒游夏之儔。所記以解釋六藝者也。家君以為外戚傳稱史佚教其子以爾雅。爾雅小學也。又記言孔子教魯哀公學爾雅。爾雅之出遠矣。舊傳學者皆云周公所記也。張仲孝友之類。後人所足耳。

茂陵富人袁廣漢。藏鏹巨萬。家僮八九百人。於北邙山下築園。東西四里。南北五里。激流水注其內。構石為山。高十餘丈。連延數里。養白鸚鵡。紫鴛鴦。鸞牛青兕。奇獸怪禽。委積其間。積沙為

西京雜記卷三
洲嶼激水爲波潮其中致江鷗海鶴孕雛產鷄
延漫林池奇樹異草靡不具植屋皆徘徊連屬
重閣修廊行之移晷不能徧也廣漢後有罪誅
沒入爲官園鳥獸草木皆移植上林苑中
五柞宮有五柞樹皆連三抱上枝蔭覆數十畝
其宮西有青梧觀觀前三梧桐樹樹下有石
騏驎二枚刊其脇爲文字是秦始皇鄜山墓上
物也頭高一丈三尺東邊者前左脚折折處有
赤如血父老謂其有神皆含血屬筋焉

高祖初入咸陽宮周行庫府金玉珍寶不可稱
言其尤驚異者有青玉五枝燈高七尺五寸作
蟠螭以口銜燈燈燃鱗甲皆動煥炳若列星而
盈室焉復鑄銅人十一枚坐皆高三尺列在一
筵上琴筑笙竽各有所執皆綴花采儼若生人
筵下有二銅管上口高數尺出筵後其一管空
一管內有繩大如指使一人吹空管一人紐繩
則衆樂皆作與真樂不異焉有琴長六尺安十
三絃二十六徽皆用七寶飾之銘曰潘璵之樂

西京雜記卷三
三
玉管長二尺三寸。二十六孔。吹之則見車馬山林。隱鱗相次。吹息亦不復見。銘曰：昭華之琯。有方鏡廣四尺。高五尺九寸。表裏有明。人直來照之。影則倒見。以手捫心而來。則見腸胃五臟。歷然無礙。人有疾病在內。則掩心而照之。則知病之所在。又女子有邪心。則膽張。心動。秦始皇帝以照宮人。膽張。心動者。則殺之。高祖悉封閉。以待項羽。羽併將以東。後不知所在。
尉佗獻高祖鮫魚荔枝。高祖報以蒲桃錦四匹。

戚夫人侍兒賈佩蘭。後出爲扶風人段儒妻。說在宮內。嘗見戚夫人侍高帝。嘗以趙主如意爲言。而高祖思之。幾半日不言。歎息悽愴。而未知其術。輒使夫人擊筑。高祖歌大風詩以和之。又說在宮內。嘗以絃管歌舞相歡娛。競爲妖服。以趣良音。十月十五日。共入靈女廟。以豚黍樂神。吹笛擊筑。歌上靈之曲。既而相與連臂踏地爲節。歌赤鳳凰來。至七月七日。臨百子池。作千闌樂。樂畢。以五色縷相羈。謂爲相連愛。八月四

日出雕房北戶竹下圍碁勝者終年有福負者終年疾病取絲縷就北辰星求長命乃免九月九日佩茱萸食蓬餌飲菊華酒令人長壽菊華舒時并採莖葉雜黍米釀之至來年九月九日始熟就飲焉故謂之菊華酒正月上辰出池邊盥濯食蓬餌以祓妖邪三月上巳張樂於流水如此終歲焉戚夫人死侍兒皆復爲民妻也何武葬北邙山薄龍坂王嘉冢東北一里杜子夏葬長安北四里臨終作文曰魏郡杜郡

立志忠欵犬馬未陳奄先草露骨肉歸於后土氣魂無所不之何必故丘然後卽化封於長安北郭此焉宴息及死命刊石埋於墓側墓前種松柏樹五株至今茂盛

淮南王安著鴻烈二十一篇鴻大也烈明也言大明禮教號爲淮南子一曰劉安子自云字中皆挾風霜楊子雲以爲一出入

公孫弘著公孫子言刑名事亦謂字直百金司馬長卿賦昔人皆稱典而麗雖詩人之作不

能加也。楊子雲曰：長卿賦不似從人間來，其神化所至，邪子雲學相如爲賦，而弗逮，故雅服焉。長安有慶虬之，亦善爲賦，嘗爲清思賦，昔人不之貴也。乃託以相如所作，遂大見重於世。

相如將獻賦，未知所爲，夢一黃衣翁謂之曰：可爲大人賦，遂作大人賦，言神仙之事以獻之，賜錦四匹。

相如將聘茂陵人女爲妻，卓文君作白頭吟以自絕，相如乃止。

樊將軍噲問陸賈曰：自古人君皆云受命於天，云有瑞應，豈有是乎？賈應之曰：有之。夫目矚得酒食，燈火孳得錢財，乾鵲噪而行人至，蜘蛛集而百事喜，小既有徵，大亦宜然。故目矚則咒之，火孳則拜之，乾鵲噪則餒之，蜘蛛集則放之，況天下大寶，人君重位，非天命何以得之哉？瑞者寶也，信也。天以寶爲信，應人之德，故曰瑞應無天命，無寶信，不可以力取也。

霍將軍妻一產二子，疑所爲兄弟，或曰：前生爲

兄後生者為弟。今雖俱日，亦宜以先生為兄。或曰：居上者宜為兄，居下者宜為弟。居下者前生，今宜以前生為弟。昔霍光聞之，曰：昔殷主祖甲，一產二子，曰囂，曰良。以卯日生，囂以己日生，良則以酉為兄，以良為弟。若以在上者為兄，囂亦當為弟。昔許釐莊公，一產二女，曰妖，曰茂。楚大夫唐勒，一產二子，一男一女，男曰貞夫，女曰瓊華。皆以先生為長。近代鄭昌，皆文長，齊並生二男，滕公一，生二女，李黎生一男一女，並以前生者

為長。霍氏亦以前生為兄焉。

枚臯文章敏疾。長卿制作淹遲。皆盡一嘗之譽。而長卿首尾溫麗。枚臯皆有累句。故知疾行無善迹矣。楊子雲曰：軍旅之際，戎馬之間，飛書馳檄，用枚臯廊廟之下，朝廷之中，高文典冊，用相如。

西京雜記卷第三終

[Faint, illegible handwritten text and markings on the left page]

[Faint, illegible handwritten text and markings on the right page]

<i>[Large empty rectangular frame]</i>
--

